



Plaid pastoral per la Cureisma 2025

Joseph Maria Bonnemain

Uestg da Cuera

Avis pils texts liturgics:

Lecziuns dall'emprema dumengia da Cureisma, ciclus C

1. Lecziun: *Dtn 26, 4–10*
2. Lecziun: *Rom 10, 8–13*
Evangelii: *Lc 4, 1–13*

*Quest plaid pastoral sa vegnir prelegius en tuts
survetschs divins dall'emprema dumengia da
Cureisma, ils 9 da mars 2025, ni ch'el stat
a disposiziun via messadi da video.*

Caras soras, cars frars

All'entschatta dil temps da Cureisma envida la Baselgia mintg'onn da meditar las tentaziuns che Jesus ha giu el desiart.

«Il carstgaun viva buca mo da paun» ha Jesus cunterdetg al Satan. (Lk 4,4) Na, nus vivin buca mo dil paun, mobein dil paun che nus partin culs auters. El nutrescha nus, sche nus fagein il nies per che auters sappien senutrir. Saziar la fom dils auters scufflescha in futur. Ei garantisce l'atgna existenza, sco l'Acziun da Cureisma accentuescha. Leutier va fetg bein a prau in'oraziun che vegn attribuida a Mumma Teresa da Calcutta:

« Segner, cu jeu hai fom,

tarmetta a mi enzatgi che drova nutriment.

Cu jeu hai seit,

tarmetta a mi enzatgi che brama per ina bubronda.

Cu jeu schelel,

tarmetta a mi enzatgi al qual jeu sai dar cauld.»

Lein en quei temps da Cureisma empruar da suandar Jesus enten dar damogn allas tentaziuns, allas qualas Jesu ei staus exponius. Il giavel ha fatg amogna ad el da surdar tuttas rihezias dalla tiara, sch'el adurass el. Nus enconuschein la risposta da Jesus: « *Ti dueis adurar il Segner tiu Diu e survir mo ad el.*» (Lk 4,8)

En scadin carstgaun savein nus enconuscher la preschientscha da Diu: en scadin carstgaun, independentamein dalla razza, dalla colur, dil lungatg, dalla naziunalitad, cultura e religiun; oravontut en quels che vegnan discriminai, ignorai, scatschai, laschai a miez liug, persecutai e tractai malgestamein. Da star en schanuglias avon ils basignus, ei quei che plai a Diu il meglier. Era quei formulescha mumma Teresa a moda exemplarica:

*«Sche jeu hai spir malempernaivladads,
muossa a mi enzatgi che jeu sai consolar.*

*Sche jeu sun paupra,
meina mei tier enzatgi en miseria.*

*Sche jeu sun decuraschada,
tarmetta a mi enzatgi che jeu sai encuraschar.*

*Sche jeu hai buca peda,
dai a mi enzatgi a qual jeu sai gidar per entgins
muments.»*

Ed ussa la tiarza tentaziun dil Segner duront ses curonta dis el desiert e sia risposta: «*Sche ti eis Fegl da Diu, sefiera cheu surengiu! Pertgei ei stat scret: Per amur da tei dat el camond a ses aunghels da pertgitar tei, ed els portan tei sin maun, che ti scarpetschies buca cun tiu pei en in crap. Mo Jesus ha rispundiu ad el: **Ti dueis buca empruar il Segner, tiu Diu.***» (Lk 4, 9-12)

Ella cardientscha promova nus buca il sensaziunal, mobein il redimensiunar mudestiamein il maletg da sesez e dils agens basegns, lu nossa promptadad da promover la grondezia e la reputaziun dils auters. La promptadad da survir a quels che han el mund buca vusch, ei il sigil da qualidad d'ina vera Baselia catolica. Lein schar vegnir a plaid Mumma Teresa:

*«Sche jeu patratgel mo vid memezza,
diregia mia atenziun sin carstgauns en miseria.
Sche jeu drovel la capientscha dad auters,
dai a mi enzatgi che drova da mia vart capientscha.
Sch'ei fa basegns ch'enzatgi s'empatschi da mei,
tarmetta a mi enzatgi che drova miu quitau.
Sche jeu vegnel offendida,
fai che jeu sappi ludar enzatgi.*

*Sche mia crusch ei greva,
lai purtar mei la crusch d'enzatgi auter.»*

Possi Dieus dar a nus en quei temps da Cureisma la glisch interna, per saver viver aschia sco Jesus ha viviu, d'agir aschia sco Mumma Teresa ha formulau ei en sia oraziun. In benediu temps da Cureisma giavischel jeu a tuttas e tuts!

+ *Joseph Maria*

Joseph Maria Bonnemain
Uestg da Cuera